

ZAKON

O TURISTIČKO-UGOSTITELJSKOJ DJELATNOSTI

I. OSNOVNE ODREDBE

Član 1.

Ovim Zakonom uređuje se turistička privreda, način i uslovi rada u turističkoj privredi, kao i turističko-ugostiteljska inspekcija i nadzor na području Tuzlanskog kantona (u daljem tekstu: Kanton).

Član 2.

Turističkom privredom smatra se turistička i ugostiteljska djelatnost.

II. TURISTIČKA DJELATNOST

Član 3.

Turističkom djelatnošću u smislu ovog Zakona smatra se pružanje usluga putničke agencije, turističkog vodiča, pratioca, animatora i zastupnika, turističke usluge u nautičkom turizmu, seoskom domaćinstvu, zdravstvenom, kongresnom, vjerskom, sportskom, lovnom i drugim oblicima turizma kao i pružanje ostalih turističkih usluga.

Član 4.

Turistička djelatnost obuhvata:

1. organizovanje i provođenje putovanja i boravka lica,
2. posredovanje u pružanju pojedinačnih i grupnih usluga putovanja i boravka i obavljanje drugih za njih vezanih usluga,
3. pružanje usluga turističkog vodiča, pratioca i zastupnika,
4. turistička animacija,
5. usluge iznajmljivanja objekata i vozova,
6. davanje obavještenja i savjeta o ponudi i korištenju usluga prijevoza, boravka i drugih za putnike važnih usluga,
7. staranje o prtljagu putnika tokom korištenja turističkih usluga,
8. posredovanje kod osiguranja putnika i prtljage,
9. poslovi na razvijanju i organizovanju posebnih oblika turizma (vjerski, nautički, seoski, zdravstveni, lovni, izletnički i dr.),
10. pribavljanje putnih isprava, viza i drugih isprava potrebnih za prijelaz granice i boravka u inostranstvu,
11. pružanje usluga s plovnim objektima i usluga na njima ukoliko ih prodaje ovlaštena agencija,
12. čuvanje i održavanje plovnih objekata, usluge skipera, kao i druge usluge za potrebe nautičkog turizma,
13. agencijski poslovi za prihvat i otpremu turističkih plovnih objekata,
14. izdavanje u zakup vozila, jahti i drugih plovnih objekata, bicikala, pribora za skijanje, ronjenje i druge sportske opreme, kao i posredovanje kod davaoca usluga radi njihovog pribavljanja,
15. poslovi u vezi s pribavljanjem odobrenja za lov i ribolov,
16. poslovi na organizovanju i izvodjenju programa putovanja i boravka na zahtjev ili po

"Službene novine Tuzlanskog kantona", broj: 10/00

- programu putnika, grupe putnika ili pravnih lica - organizatora (incentive) putovanja i boravka, organizovanje skupova ili izložbi sa ili bez putovanja i boravka učesnika, usluge u okviru zdravstvenog, lovnog turizma i dr.,
17. prodaja i posredovanje u prodaji turističkih usluga,
 18. prodaja voznih karata,
 19. poslovi u vezi sa izdavanjem soba i apartmana od strane fizičkih lica i pružanja usluga fizičkih lica na plovnim objektima,
 20. prodaja ulaznica za sportske, kulturne i druge priredbe,
 21. prodaja robe vezane za potrebe putovanja,
 22. posredovanje pri izdavanju i naplati putničkih čekova i kreditnih kartica.

Ministar trgovine i turizma Kantona (u daljem tekstu: ministar) može za pojedine turističke usluge, koje nisu obuhvaćene ovim Zakonom ili federalnim propisom, propisati uslove i način za njihovo obavljanje.

Član 5.

Turističku djelatnost mogu obavljati pravna i fizička lica koja ispunjavaju uslove propisane zakonom.

Član 6.

Predmet poslovanja subjekata koji obavljaju turističku djelatnost mora biti utvrđen aktom o osnivanju u skladu sa ovim Zakonom, te drugim propisima i običajima u turizmu, s tim da poslovi iz člana 4. ovog Zakona moraju biti i poimenično navedeni.

Član 7.

Preduzeća i drugi subjekti koji obavljaju turističku djelatnost obavezni su:

1. poslovati u skladu s odredbama ovog Zakona, propisa donesenih na osnovu ovog Zakona, te u skladu s poslovnim običajima u turizmu,
2. pružati turističke usluge koje prema propisima i običajima spadaju u predmet njihovog poslovanja,
3. objaviti sadržaj i cijenu svake pojedine usluge i pridržavati se tih sadržaja i cijena,
4. za svaku izvršenu turističku uslugu korisniku usluge izdati račun s brojem i čuvati kopije tog računa za vrijeme koje je određeno propisima iz područja računovodstva, odnosno, najmanje 30 dana od dana izdavanja računa,
5. najkasnije u roku od 8 dana odgovoriti na zahtjev za traženu turističku uslugu i izvršiti prihvaćenu uslugu prema ugovorenim uslovima,
6. u prostorijama i na mjestima gdje se prodaju turističke usluge voditi knjigu žalbi i u roku od 15 dana odgovoriti na svaki izneseni prigovor,
7. pridržavati se i svih drugih uslova poslovanja koje su sami utvrdili.

Član 8.

Sportski klubovi, sindikati, vjerske zajednice i sl. (u daljem tekstu: udruženja) mogu organizovati putovanje i boravak isključivo za svoje članove.

Reklamiranje i promocija za putovanja i boravke iz prethodnog stava dozvoljeno je jedino internim glasilima i saopštenjima koje dobijaju članovi udruženja.

Udruženja su obavezna za putovanja i boravke iz stava 1. ovog člana koristiti samo ona prijevozna sredstva u kojima su putnici i prtljaga osigurani.

A. PUTNIČKA AGENCIJA

Član 9.

Putničkom agencijom u smislu ovog Zakona, smatra se pravno lice upisano u sudski registar koje se bavi organizovanjem turističkih i poslovnih putovanja i boravka, posredovanjem i pružanjem svih ostalih usluga u vezi s time, te prodajom svog vlastitog turističkog proizvoda kojeg stvara objedinjavanjem raznih vrsta turističkih usluga.

Član 10.

Putnikom u smislu ovog Zakona smatra se korisnik turističkih usluga koji kupuje ili je saglasan kupiti turistički paket-aranžman, odnosno turističko putovanje ili druge turističke usluge.

Član 11.

Turističkim paket-aranžmanom, u smislu ovog Zakona, smatra se unaprijed utvrđena kombinacija od najmanje dvije ponudjene pojedinačne usluge koje se prodaju po jednoj, unaprijed utvrđenoj cijeni s tim da ukupna usluga traje dulje od dvadeset i četiri sata i uključuje jedno noćenje, odnosno smještaj.

Izletničkim programom, u smislu ovog Zakona, smatra se kombinacija od najmanje dvije ponudjene usluge, ali koje traju manje od dvadeset četiri sata i ne uključuju noćenje, odnosno smještaj.

Poslovi putničke agencije

Član 12.

Poslovi putničke agencije su:

1. organizovanje i prodaja turističkih paket-aranžmana,
2. organizovanje i prodaja izletničkih programa,
3. posredovanje u prodaji karata ili rezervaciji mjesta za sva prijevozna sredstva,
4. posredovanje pri rezervaciji smještaja i pružanju usluga u ugostiteljskim objektima,
5. zastupanje domaćih i stranih putničkih agencija i nudjenjeu njihovo ime, usluga utvrđenih tačkom 1. ovog stava,
6. davanje turističkih obavijesti i nudjenje propagandnog materijala,
7. usluge mjenjačnice, prodaju i kupovinu putničkih čekova,
8. otprema, prijevoz i prijenos prtljage,
9. pravne usluge u vezi s osiguranjem putnika i prtljage,
10. iznajmljivanje automobila sa ili bez vozača, kao i posredovanje kod iznajmljivanja automobila,
11. rezervacije, nabavka i prodaja ulaznica za sve vrste priredbi, muzeja i dr.
12. iznajmljivanje opreme, pribora i sprava za sport i rekreaciju,
13. unajmljivanje letjelica, brodova, autobusa, automobila, specijalnih vozova i drugih prijevoznih sredstava za potrebe vlastitih turističkih usluga,
14. organizovanje usluga smještaja i prehrane u ugostiteljskim objektima,
15. organizovanje čarter prijevoza,
16. poslovi na razvijanju i organizovanju posebnih oblika turizma (zdravstveni, kongresni, lovni, izletnički, vjerski i dr.),
17. organizovanje lova i ribolova za turiste,
18. prodaju robe vezane za potrebe putovanja,
19. druge usluge srodne turističkoj djelatnosti.

Obaveze putničke agencije

Član 13.

Pored uslova koje treba ispuniti da bi dobila odobrenje za obavljanje djelatnosti putničke agencije (član 19. ovog Zakona), putnička agencija obavezna je:

1. na ulazu u poslovni prostor putničke agencije izložiti natpisnu ploču na kojoj je firma putničke agencije,
2. ukoliko obavljajući turističke usluge zastupa druge putničke agencije na zahtjev korisnika njenih usluga izjasniti se u kakvom svojstvu to radi i koji joj je obim ovlaštenja.
3. na ulazu u putničku agenciju-poslovnicu ili u neposrednoj blizini vidno istaći radno vrijeme i pridržavati se istog.

Član 14.

Putnička agencija obavezna je prijevoz putnika obavljati vlastitim prijevoznim sredstvima ili prijevoznim sredstvima u vlasništvu drugih pravnih i fizičkih lica koja su registrovana za obavljanje djelatnosti prijevoza putnika.

Izuzetno od odredbe iz stava 1. ovog člana, ukoliko prijevoz putnika nije moguće izvršiti na način određen u stavu 1. ovog člana, može se u prijevozu putnika koristiti i prijevozno sredstvo u vlasništvu inostranih pravnih i fizičkih lica.

Odnos između turističkih agencija i pravnih i fizičkih lica koja obavljaju prijevoz putnika za potrebe turističkih agencija reguliše se ugovorom i to pojedinačno za svaki turistički aranžman ili izletnički program.

Usluge smještaja i prehrane a koje su utvrđene turističkim paket-aranžmanom i izletničkim programom isključivo će se koristiti u objektima i poslovnim prostorijama pravnih i fizičkih lica koja posjeduju rješenje za pružanje istih.

Član 15.

Firma, sjedište i adresa putničke agencije moraju biti vidljivo naznačeni u svim reklamnim i propagandnim materijalima kao i svim drugim poslovnim dokumentima putničke agencije.

Član 16.

Kada putnička agencija organizuje grupna putovanja obavezna je tokom cijelog putovanja osigurati turističkog pratioca koji posjeduje odgovarajuću sposobnost i kvalifikaciju.

Putnička agencija u slučajevima iz stava 1. ovog člana dužna je osigurati najmanje jednog turističkog pratioca na svakih 70 putnika, nezavisno od vrste prijevoza.

Ako putnička agencija ne raspolaže sa kvalifikovanim turističkim pratiocem, ona može osigurati stručnog radnika koji je osposobljen za rad u turističkoj djelatnosti.

Za grupne posjete gradovima i turističkim mjestima za koja je u programu predviđeno razgledanje grada, odnosno, turističkih mjesta, putnička agencija obavezna je angažovati turističkog vodiča koji je ovlašten za pružanje usluge turističkog vođenja.

Član 17.

Putnička agencija obavezna je za svaki aranžman, odnosno, putovanje izdati program, prospekt ili katalog kojeg je putniku obavezna staviti na raspolaganje prije sklapanja ugovora o organizovanju putovanja ili korištenja drugih usluga, a koji sadrži:

1. detaljan opis putovanja i sredstava prijevoza, smještaja i obroka prehrane, kao i svih dodatnih usluga,
2. naznaku redoslijeda i vremena pružanja pojedinih usluga (itinerer),

"Službene novine Tuzlanskog kantona", broj: 10/00

3. cijenu organizovanog putovanja i posebno cijenu usluga koje nisu uključene u cijenu aranžmana,
4. datum početka i završetka putovanja,
5. informacije i savjete o putovanju i uslugama koje bi putniku trebale biti značajne (npr. o valuti, klimi, zdravstvenim uslovima, itd.),
6. uslove prijave i otkaza, te za šta sve organizator garantuje putniku.

Član 18.

Putnička agencija obavezna je koristiti prijevozna sredstva osigurana obaveznim osiguranjem putnika u skladu sa zakonom.

Putnička agencija dužna je putniku ponuditi i posebno osiguranje od povreda, smrti, troškova liječenja, gubitka prtljage i drugih rizika tokom putovanja.

Upis putničke agencije u sudski registar

Član 19.

Za upis putničke agencije u sudski registar preduzeće treba ispuniti uslove utvrđene zakonom.

Odgovornost putničke agencije

Član 20.

Putnička agencija koja se bavi organizovanjem putovanja dužna je osigurati se kod društva za osiguranje za rizike koji nastaju kod organizovanja putovanja.

Obavezno osiguranje za rizike kod organizovanja putovanja ostvaruje se osiguranjem putnika i njihove prtljage (za moguće povrede tijela, smrt, bolest, gubitak prtljage, i sl.).

Član 21.

Policom osiguranja iz člana 18. ovog Zakona obavezno moraju biti pokriveni odgovornosti za materijalne i nematerijalne štete koje bi mogli pretrpiti korisnici usluga putničke agencije.

Pokriće iz stava 1. ovog člana uključuje rizike od svih vrsta elementarnih nesreća, tjelesnih povreda, materijalnih i finansijskih šteta.

Putnička agencija je dužna voditi brigu da je polica osiguranja iz stava 2. ovog člana uvijek važeća.

Poslovni prostor i opremljenost

Član 22.

Za obavljanje poslovanja putnička agencija u sjedištu firme mora raspolagati poslovnim prostorijama koje omogućuju uspješno i kvalitetno obavljanje djelatnosti.

Član 23.

Poslovne prostorije iz člana 22. ovog Zakona moraju ispunjavati slijedeće uslove:

1. da su namjenjene isključivo poslovanju putničke agencije, u skladu sa odredbama ovog Zakona,
2. da je zasebna cjelina u odnosu na druge poslovne prostorije pravnih i fizičkih lica koje posluju u istom objektu,
3. u poslovnim prostorijama putničke agencije mora tokom poslovnog vremena biti stalno

prisutno jedno lice koje ispunjava uslove za rad u putničkoj agenciji, propisane ovim Zakonom.

Izuzetno, od odredbe tačke 2. stava 1. ovog člana, poslovne prostorije ne moraju biti zasebna poslovna cjelina u slučaju kada se te prostorije nalaze u objektima namijenjenim drugim aktivnostima: u hodnicima hotela, u sajamskim prostorijama, na kolodvorima ili terminalima za javne usluge kopnenog, zračnog prijevoza ili su u sastavu objekata koji predstavljaju kulturno-historijsko zdanje.

Poslovna tajna

Član 24.

Putnička agencija je dužna čuvati kao poslovnu tajnu sve što je saznala o licu-putniku i bez odobrenja lica-putnika nikome ne smije saopćiti njegovu adresu, mjesto, vrijeme putovanja, boravak, uplaćenu cijenu, a ni imena njegovih saputnika.

Voditelj poslovnice

Član 25.

Putnička agencija koja neposredno prodaje turističke paket-aranžmane i izletničke programe mora imati u svakoj poslovnici najmanje jednog zaposlenog voditelja poslovnice koji ispunjava propisane uslove.

Voditelj poslovnice odgovara za rad u poslovnici u skladu sa ovim Zakonom.

Član 26.

Voditelj poslovnice treba da ispunjava slijedeće uslove:

1. da je državljanin Bosne i Hercegovine, sa prebivalištem na teritoriji Bosne i Hercegovine;
2. da je poslovno sposoban;
3. da ima najmanje srednju stručnu spremu;
4. da aktivno zna jedan strani jezik (svjetski);
5. da ima položen stručni ispit za voditelja poslovnice;
6. da mu pravosnažnom presudom ili rješenjem o prekršaju nije izrečena mjera zabrane obavljanja poslova voditelja poslovnice, dok ta mjera traje;
7. da ispunjava i druge uslove propisane odlukom o osnivanju.

Član 27.

Stručni ispit za voditelja poslovnice polaže se pred ispitnom komisijom koja se formira pri Ministarstvu trgovine i turizma (u daljem tekstu: Ministarstvo), a prema ispitnom programu kojeg propisuje ministar.

O položenom ispitu izdaje se posebno uvjerenje.

O izdatim uvjerenjima vodi se posebna evidencija koju propisuje ministar.

B. TURISTIČKI VODIČ, PRATILAC, ANIMATOR I ZASTUPNIK

Turistički vodič

Član 28.

Turistički vodič je lice koje turistima pokazuje i stručno objašnjava prirodne ljepote i rijetkosti, kulturno-historijske spomenike, umjetnička djela, etnografske i druge znamenitosti, historijske događaje i legende o tim događajima i ličnostima, društveno-političke tokove i zbivanja, te

"Službene novine Tuzlanskog kantona", broj: 10/00

ekonomska dostignuća mjesta i područja (u daljem tekstu: turistički vodič).

Ne smatra se turističkim vodičem stručni radnik koji obavlja poslove vodiča na svom radnom mjestu kod pravnog lica ili fizičkog lica unutar poslovnog prostora u kojem radi (muzej, galerija, nacionalni park i sl.) stručni radnik putničke agencije koji prati grupu turista iz mjesta, vodič u planinama i jamama, u lovu i ribolovu, kao i voditelj i pratilac ekskurzije i izleta.

Član 29.

Turistički vodič može biti lice:

1. koje je državljanin Bosne i Hercegovine, sa prebivalištem na teritoriji Bosne i Hercegovine,
2. koje ima potpunu poslovnu sposobnost,
3. koje ima najmanje srednju stručnu spremu,
4. položen stručni ispit za turističkog vodiča,
5. koje poznaje jedan strani jezik (svjetski),
6. kojem pravosnažnom presudom ili rješenjem o prekršaju nije izrečena zaštitna mjera zabrane obavljanja poslova turističkog vodiča.

Član 30.

Turistički vodič dužan je poslove vodiča obavljati savjesno i stručno, u skladu sa odredbama ovog Zakona, poslovnim običajima, statutom i aktima udruženja turističkih vodiča čiji je član.

Član 31.

Putnička agencija i drugi korisnici usluga turističkog vodiča, ne mogu obavljanje usluga turističkog vodiča povjeriti licu koje ne ispunjava uslove propisane zakonom.

Član 32.

Istaknutim naučnicima i stručnjacima može se priznati svojstvo počasnog turističkog vodiča iz područja uže specijalnosti. Počasni turistički vodič može obavljati poslove vodiča samo povremeno. Svojstvo počasnog turističkog vodiča utvrđuje ministar.

Član 33.

Pri obavljanju poslova, turistički vodič mora imati legitimaciju turističkog vodiča kojom se utvrđuje njegovo svojstvo. Legitimaciju turističkog vodiča, turistički vodič pri obavljanju poslova mora nositi na vidljivom mjestu.

Član 34.

Za pružanje usluga turističkog vodiča, turistički vodič mora posjedovati odobrenje nadležnog organa općine.

Odobrenje iz stava 1. ovog člana izdaje na zahtjev turističkog vodiča nadležni organ općine, na čijem području turistički vodič ima prebivalište.

Član 35.

Odobrenje iz člana 34. ovog Zakona mora sadržavati:

1. Ime i prezime, ime jednog roditelja i jedinstveni matični broj građanina turističkog vodiča, mjesto prebivališta, područje na kojem će obavljati poslove,
2. Stečenu stručnu spremu i datum kada je položio ispit za turističkog vodiča,
3. Jezike na kojima će pružati usluge turističkog vodiča,
4. Period u kojem pruža usluge - ako turistički vodič pruža usluge samo u jednom periodu tokom godine (sezonski).

Stečena stručna sprema unosi se u odobrenje u skladu sa podacima o položenom stručnom ispitu. Član 36.

Općinski organ dostavit će odobrenje iz člana 34. ovog Zakona nadležnoj organizacionoj jedinici porezne uprave kao i kantonalnoj turističko-ugostiteljskoj inspekciji.

Član 37.

Odobrenje za pružanje usluga turističkog vodiča upisuje se u Upisnik koji vodi nadležni općinski organ.

Član 38.

Odobrenje za pružanje usluga turističkog vodiča prestaje vrijediti u slijedećim slučajevima:

1. Odjavom-danom podnošenja odjave nadležnom organu općine;
2. Ako prestane ispunjavati jedan od propisanih uslova iz člana 29. ovog Zakona;
3. Ako se naknadno utvrdi da je izdato odobrenje zasnovano na neistinitim podacima ili krivotvorenim dokumentima.

O prestanku odobrenja iz stava 1. ovog člana nadležni organ općine donosi posebno rješenje.

Turistički pratilac

Član 39.

Turistički pratilac je lice koje obavlja operativno-tehničke poslove u vodjenju i praćenju turista, te daje turistima osnovna saopćenja o svrsi putovanja.

Član 40.

Turistički pratilac je lice koje ispunjava uslove iz člana 29. ovog Zakona, osim uslova iz tačke 4. tog člana, i položen ispit za turističkog pratioca.

Lica koje imaju položen stručni ispit za turističkog vodiča oslobođene su polaganja ispita za turističkog pratioca.

Član 41.

Ispit za turističkog pratioca polaže se pred ispitnom komisijom Ministarstva, a prema ispitnom programu kojeg propisuje ministar.

Jedan član komisije se obavezno bira iz reda zaposlenih stručnih radnika Ministarstva.

O položenom ispitu uvjerenje izdaje Ministarstvo.

Član 42.

Prilikom pružanja usluga turističkog pratioca, turistički pratilac mora imati uvjerenje o položenom ispitu, kojim se utvrđuje njegovo svojstvo.

Član 43.

Putnička agencija ne može obavljanje poslova turističkog pratioca povjeriti licu koje ne ispunjava uslove propisane zakonom.

Turistički animator

Član 44.

Turistički animator je lice koje organizuje slobodno vrijeme turistima koji se nalaze na organizovanom turističkom putovanju za vrijeme njihovog boravka u hotelima.

Turistički animator koji samostalno obavlja poslove iz stava

1. ovog člana, dužan je pribaviti odobrenje nadležnog organa općine uz obavezno predočenje programa animacije.

Odobrenje će se izdati licu koje ispunjava uslove iz člana 40.stav 1. ovog Zakona.

Turistički zastupnik

Član 45.

Turistički zastupnik je lice koje zastupa organizatora putovanja u mjestu ispunjavanja usluga.

Prije otpočinjanja obavljanja poslova iz stava 1. ovog člana, turistički zastupnik je obavezan dostaviti ugovor o zastupanju Ministarstvu radi upisa u Upisnik ugovora o zastupanju.

Upisnik ugovora o zastupanju vodi Ministarstvo.

Ministar će propisati oblik, sadržaj i način vođenja Upisnika iz stava 3. ovog člana.

Član 46.

Ovlaštenja i obaveze turističkog zastupnika su slijedeća:

- štiti interese i prava putnika i organizatora putovanja kod davaoca usluga,
- pruža obavještenja i upute putnicima kod izvršenja programa putovanja i dodatnih usluga,
- naručuje dodatne usluge u ime organizatora putovanja, prema dobivenim ovlaštenjima,
- posreduje u pribavljanju dodatnih usluga za putnike (izlet, kulturne i sportske priredbe i sl.),
- obavlja i druge poslove potrebne za zaštitu interesa putnika i organizatora putovanja.

C. TURISTIČKE USLUGE U NAUTIČKOM TURIZMU

Član 47.

Nautički turizam je u smislu ovog Zakona, plovidba i boravak turista (u daljem tekstu: nautičara) na rijekama i jezerima radi odmora i rekreacije u neposrednom dodiru s prirodom.

Član 48.

Usluge u nautičkom turizmu su:

1. iznajmljivanje prostora uz uredjenu i djelimično ili potpuno zaštićenu obalu (u daljem tekstu: vez) za smještaj plovnih objekata i nautičara koji borave na njima,
2. iznajmljivanje plovnih objekata za pojedinačna i porodična krstarenja u priobalju (chartering),
3. iznajmljivanje plovnih objekata za grupna kružna putovanja u priobalju (cruising),
4. iznajmljivanje posebno opremljenih plovnih objekata za grupna putovanja i pružanje usluga podvodnog ronjenja,
5. prihvata, čuvanje i održavanje plovnih objekata na vezu na rijekama, jezerima i suhom vezu,
6. usluge snabdijevanja (vodom, gorivom u posebnim pumpama, namirnicama, rezervnim dijelovima, opremom i sl.),
7. škole jedrenja, obuke za skipere i voditelje čamaca,
8. uredjenje i pripremanje plovnih objekata,

9. davanje različitih informacija (vremenska prognoza, nautički vodič i sl.) i
10. ostale usluge u vezi s putovanjem i boravkom turista nautičara.

Član 49.

Usluge u nautičkom turizmu mogu pružati pravna i fizička lica koja ispunjavaju uslove propisane zakonom.

Član 50.

Usluge u nautičkom turizmu pružaju se u marinama i u drugim lukama otvorenim za putnički promet i nautičko-turističkim centrima (u daljem tekstu: luke nautičkog turizma).

Luke nautičkog turizma se razvrstavaju i kategoriziraju.

D. TURISTIČKE USLUGE U SEOSKOM DOMAĆINSTVU

Član 51.

U seoskom domaćinstvu mogu se pružati usluge boravka turista radi odmora i rekreacije u ugodjaju seoskog života i krajolika s mogućnošću sudjelovanja u aktivnostima seoskog domaćinstva.

Član 52.

Turističke usluge u seoskom domaćinstvu naročito su: iznajmljivanje konja za jahanje, lova i ribolova na seoskom gazdinstvu, fotosafari, organizovanje branja plodova i gljiva, berbe voća i povrća, ubiranje ljetine i dr.

Turističke usluge iz stava 1. ovog člana može pružati vlasnik seoskog domaćinstva sa članovima svoje porodice ukoliko ispuni uslove propisane ovim Zakonom.

E. OSTALE TURISTIČKE USLUGE

Član 53.

Ostalim turističkim uslugama smatraju se:

- iznajmljivanje sandolina, te njihov smještaj i čuvanje,
- iznajmljivanje jedrilica, dasaka za jedrenje, bicikla na vodi,
- iznajmljivanje pribora i opreme za kupanje i skijanje na vodi,
- iznajmljivanje suncobrana i ležaljki i dr.,
- iznajmljivanje skijaške, ribolovne opreme i sl.

Član 54.

Za pružanje usluga iz članova 52. i 53. ovog Zakona, ukoliko ih ima namjeru pružati fizičko lice, obavezno je pribaviti odobrenje nadležnog organa općine.

Odobrenje iz stava 1. ovog člana može pribaviti lice koje ispunjava slijedeće uslove:

1. da je državljanin Bosne i Hercegovine, sa prebivalištem na teritoriji Bosne i Hercegovine,
2. da je starije od 15 godina,
3. da raspolaže sredstvima za pružanje usluga i dokazom o vrijednosti sredstava,
4. da je pribavilo važeću policu osiguranja iz koje se pokriva šteta korisniku usluge u slučaju nesreće,
5. da je poslovno sposobno,
6. da mu nije izrečena mjera zabrane obavljanja djelatnosti pružanja turističkih usluga,
7. da posjeduje rješenje o ispunjavanju minimalno-tehničkih i drugih zakonom propisanih uslova.

Član 55.

Rješenje o odobrenju za pružanje usluga lica iz člana 54. stava 1. ovog Zakona obavezno sadrži:

1. ime i prezime, ime jednog roditelja lica te njegov jedinstveni matični broj,
2. vrstu usluge i kapacitet koju će lica pružati,
3. mjesto gdje se usluga pruža,
4. naznaku da li se usluga pruža tokom cijele godine ili samo sezonski.

Član 56.

Rješenje o odobrenju za pružanje usluga iz člana 54. ovog Zakona upisuje se u Upisnik odobrenja za pružanje usluga fizičkih lica koji vodi nadležni organ općine.

Član 57.

Rješenje o odobrenju iz člana 55. prestaje važiti:

1. odjavom lica, danom navedenim u odjavi ili danom podnošenja odjave nadležnom organu općine,
2. ako lice ne otpočne pružati usluge u roku od 6 mjeseci od dana pribavljenog odobrenja,
3. ako je inspekcijom nadzorom utvrđeno da nisu ispunjeni ovim Zakonom i drugim propisima određeni uslovi, a utvrđeni nedostaci nisu otklonjeni u zadanom roku,
4. ako nadležni organ općine naknadno utvrdi da je rješenje o odobrenju zasnovano na neistinitim podacima ili krivotvorenim dokazima.

O prestanku važenja rješenja o odobrenju iz stava 1. ovog člana rješenje donosi nadležan organ općine, a dostavlja ga nadležnoj organizacionoj jedinici porezne uprave i nadležnoj inspekciji.

Član 58.

Troškove postupka iz članova 54. i 57. snosi podnosilac zahtjeva.

III. UGOSTITELJSKA DJELATNOST

Član 59.

Ugostiteljskom djelatnošću smatra se pripremanje hrane i pružanje usluga prehrane, pripremanje i usluživanje pića i napitaka i pružanje usluga smještaja.

Ugostiteljskom djelatnošću smatra se i pripremanje hrane za potrošnju na drugom mjestu (u prijevoznim sredstvima, na priredbama i sl.) i snabdijevanje tom hranom (catering).

Član 60.

Ugostitelj može pružati i jednostavne ugostiteljske usluge.

Jednostavnom ugostiteljskom uslugom smatra se pripremanje i usluživanje jela bez složenije kuhinjske pripreme, kao i pripremanje i usluživanje pića i napitaka.

Jednostavne ugostiteljske usluge mogu se pružati putem pokretnih ugostiteljskih objekata, iz kioska, pod šatorom, na izletištu i sl.

Jednostavnim ugostiteljskim uslugama smatra se pripremanje i usluživanje jelima sa roštilja, gril aparata, toplim i hladnim sendvičima, hot-dog proizvoda, raznih vrsta pita i poslastica, koje se

mogu pripremati i na drugom mjestu, alkoholnih, bezalkoholnih pića i napitaka.

Jednostavne ugostiteljske usluge mogu se pružati i izvan poslovnih prostorija i prostora ugostitelja.

Izvan poslovnih prostorija i prostora ugostitelja mogu se usluživati jela u konfekcioniranom stanju, pića i napici u skladu sa zahtjevima higijene, te sladoled u originalnom pakovanju.

Nadležni organ općine utvrđuje prostore na kojima se jednostavne ugostiteljske usluge mogu pružati izvan poslovnih prostorija i prostora ugostitelja.

Član 61.

Ministar će propisati koje minimalno-tehničke uslove moraju ispunjavati objekti za pružanje jednostavnih ugostiteljskih usluga.

Član 62.

Ugostiteljsku djelatnost mogu obavljati pravna i fizička lica koja su registrovana kod nadležnog registracionog suda, odnosno kod nadležnog organa općine i ispunjavaju ostale uslove propisane za obavljanje te djelatnosti (u daljem tekstu: ugostitelji).

Prije početka obavljanja ugostiteljske djelatnosti, ugostitelji su dužni pribaviti rješenje nadležnog organa o razvrstavanju i ispunjavanju uslova za obavljanje ugostiteljske djelatnosti.

Ugostiteljsku djelatnost, pod uslovima određenim ovim Zakonom, u svojim poslovnim prostorijama i prostorima mogu obavljati i ugostiteljske obrazovne ustanove (ugostiteljske škole).

Ugostitelj može, bez upisa u registar, obavljati i druge djelatnosti u manjem obimu koje služe obavljanju ugostiteljske djelatnosti, a koje se uobičajeno obavljaju uz ugostiteljsku djelatnost (prodaju novina i časopisa, duhanskih preradjevina, pružanje usluga bilijara, sličnih zabavnih igara, kuglanja, tenisa, turističke usluge i sl.).

Član 63.

Pravna i fizička lica mogu organizovati pružanje usluga smještaja i prehrane za svoje radnike, članove, penzionere, te članove uže porodice svojih radnika i penzionera, pod uslovima utvrdjenim ovim Zakonom, propisima donesenim na osnovu ovog Zakona i drugim uslovima propisanim posebnim propisima, u objektu zatvorenog tipa (odmaralište, objekat za prehranu i sl.), bez prava pružanja usluga trećim licima.

Članovima uže porodice, u smislu odredbe stava 1. ovog člana, podrazumijevaju se: supružnici, djeca, pastorčad i usvojenici, te roditelji i suusvojitelji.

Pravna i fizička lica iz stava 1. ovog člana, obavezna su pružanje usluga prijaviti Ministarstvu prema mjestu sjedišta objekta, odnosno prema mjestu gdje se pružaju usluge, koje to upisuje u Upisnik o ugostiteljskim uslugama pravnih i fizičkih lica.

Ministarstvo rješenjem utvrđuje ispunjavanje minimalno-tehničkih uslova za pružanje usluga iz stava 1. ovog člana.

Član 64.

Odredbe ovog Zakona ne primjenjuju se na pružanje usluga prehrane i smještaja u ustanovama socijalne zaštite, zdravstvenim ustanovama, odgojno-obrazovnim i drugim sličnim ustanovama, te u vojnim objektima, objektima Ministarstva unutrašnjih poslova, ako te usluge pružaju njihovi radnici isključivo pripadnicima i korisnicima tih ustanova.

Član 65.

Ne smatra se ugostiteljskom djelatnošću pripremanje i usluživanje toplih i hladnih napitaka, bezalkoholnih pića i jednostavnih jela, koje pravna i fizička lica organizuju za potrebe svojih radnika i članova u svojim poslovnim prostorijama i prostorima.

A. PREDMET I NAČIN POSLOVANJA UGOSTITELJA

Član 66.

Fizičko lice u smislu odredbi ovog Zakona može dobiti odobrenje za osnivanje ugostiteljske radnje samo za jedan ugostiteljski objekat na teritoriji Federacije Bosne i Hercegovine.

Član 67.

Za pružanje usluga ugostitelj - fizičko lice je obavezno pribaviti odobrenje nadležnog organa općine.

Odobrenje iz stava 1. ovog člana izdat će se ugostitelju -fizičkom licu koje ispunjava sljedeće uslove:

1. da je poslovno sposoban,
2. da ima odgovarajuće poslovne prostorije, odnosno prostor,
3. da ispunjava propisane zdravstvene uslove,
4. da mu nije pravosnažnom sudskom presudom ili rješenjem o prekršaju izrečena mjera zabrane obavljanja pružanja usluga u ugostiteljskoj djelatnosti,
5. da je državljanin Bosne i Hercegovine, sa prebivalištem na teritoriji Bosne i Hercegovine,
6. da nema zasnovan radni odnos,
7. da je izmirio porezne obaveze,
8. da posjeduje rješenje nadležnog organa o razvrstavanju, minimalnim uslovima i kategoriji ugostiteljskih objekata.

Odredba iz stava 2. tačke 6.ovog člana ne odnosi se na pružanje usluga ugostitelja - fizičkog lica u domaćinstvu i seoskom domaćinstvu.

Penzioneri mogu dobiti odobrenje za osnivanje ugostiteljske radnje pod uslovima utvrđenim ovim Zakonom i propisima o penzijsko-invalidskom osiguranju.

Član 68.

O odobrenju iz člana 67. stav 1. ovog Zakona, nadležni organ općine rješava rješenjem u roku od 15 dana od dana uredno podnesenog zahtjeva.

Član 69.

Rješenje o odobrenju za pružanje usluga ugostitelja - fizičkog lica obavezno sadrži:

1. ime i prezime, ime jednog roditelja i jedinstveni matični broj gradjanina,
2. naziv firme,
3. mjesto, ulicu i broj objekta u kojem se pruža usluga,
4. vrstu usluge koja se pruža,
5. vrstu i kategoriju objekta u kojem pruža usluge,
6. naznaku o pružanju usluga tokom cijele godine ili sezonski. Rješenje o odobravanju pružanja ugostiteljskih usluga ne može se prenijeti na drugo lice.

Rješenje o odobravanju pružanja ugostiteljskih usluga i sve promjene za koje je potrebno rješenje o odobravanju, upisuju se u registar nadležnog organa općine koji je izdao rješenje.

Ugostiteljska radnja može otpočeti sa radom danom upisa u registar.

Član 70.

Rješenje o odobrenju za pružanje usluga ugostitelja - fizičkog lica prestaje važiti:

1. odjavom ugostitelja, koja se vrši pismenim putem, prije prestanka rada, kod nadležnog organa općine. Datum odjave utvrđuje se datumom podnesenog uvjerenja od strane nadležne porezne uprave. Prestanak pružanja ugostiteljskih usluga ne može se odjaviti unatrag

"Službene novine Tuzlanskog kantona", broj: 10/00

- (retroaktivno),
2. ako ugostitelj ne započne pružati usluge u roku od šest mjeseci od dana upisa u registar ugostiteljskih radnji,
 3. ako prestane ispunjavati koji od uslova navedenih u članu 67. ovog Zakona,
 4. ako je inspeksijskim nadzorom utvrđeno da nisu ispunjeni uslovi propisani ovim Zakonom, propisima donesenim na osnovu ovog Zakona i drugim propisima, a utvrđeni nedostaci nisu otklonjeni u zadanom roku,
 5. ako se naknadno utvrdi da je rješenje o odobrenju izdato na neistinitim podacima ili krivotvorenim dokazima.

U slučaju smrti ugostitelja ili stupanja na izdržavanje kazne zatvora u trajanju preko 6. mjeseci, članovi zajedničkog domaćinstva mogu nastaviti obavljati djelatnost preko zaposlenog radnika - stručnog poslovođje, ako isti ispunjava uslove iz člana 67. ovog Zakona u trajanju do 6. mjeseci.

O prestanku rješenja o odobrenju iz stava 1. ovog člana nadležni organ općine donosi rješenje i dostavlja ga nadležnoj organizacionoj jedinici porezne uprave i kantonalnoj turističko-ugostiteljskoj inspekciji.

Član 71.

Ugostitelj - fizičko lice može privremeno obustaviti obavljanje ugostiteljske djelatnosti u trajanju od jedne godine dana, u slučaju bolesti, vršenja vojne obaveze i drugim opravdanim slučajevima, o čemu podnosi pismeni zahtjev nadležnom organu općine, u roku od 15 dana od dana obustave obavljanja djelatnosti.

Rješenje o privremenoj obustavi obavljanja djelatnosti, razlozima i trajanju privremene obustave obavljanja djelatnosti donosi nadležni organ općine u roku od 8 dana od dana prijema zahtjeva.

O ponovnom početku obavljanja djelatnosti, ugostitelj - fizičko lice je dužno podnijeti zahtjev nadležnom organu općine 8 dana prije isteka vremena privremene obustave.

U slučaju nepodnošenja zahtjeva iz stava 3. ovog člana, prestaje da važi rješenje o odobrenju pružanja usluga ugostitelja.

Nadležni organ općine u roku od 8 dana od dana prijema zahtjeva izdat će rješenje o nastavljajući obavljanja djelatnosti.

Član 72.

Protiv rješenja nadležnog organa općine, podnosilac zahtjeva može Ministarstvu uputiti žalbu u roku od 15 dana od dana prijema rješenja.

Član 73.

Ugostitelj posluje tokom cijele godine ili sezonski.

Ugostitelj može poslovati i povremeno (za vrijeme trajanja manifestacija, sajмова, prigodnih priredbi i sl.).

Član 74.

Ugostitelj je obavezan:

1. poslovati u skladu sa zakonom, propisima donesenim na osnovu zakona, te poslovnim običajima u ugostiteljstvu,
2. vidno istaknuti cijene usluga koje se nude, na način dostupan gostima i pridržavati se istaknutih i objavljenih cijena, a kod pružanja usluga smještaja u cjenovnicima istaknuti i iznos boravišne takse, cjenovnike staviti na raspolaganje gostima u dovoljnom broju primjeraka,

3. voditi poslovne knjige koje sadrže podatke o nabavci, prometu robe i izvršenim uslugama, kao i osigurati dokumentaciju na osnovu koje se vodi evidencija,
4. utvrditi normative o utrošku namirnica i pića za pojedine usluge prehrane i pića, pružati usluge u količinama i kvalitetu u skladu sa normativima, te na zahtjev normativ predočiti gostu,
5. izdati gostu račun za svaku pruženu ugostiteljsku uslugu s naznakom vrste, količine i cijene pruženih usluga, a kod pružanja usluga smještaja navesti u računu i iznos boravišne takse,
6. utvrditi kućni red u ugostiteljskom objektu za smještaj i istaknuti ga na recepciji, te izvod iz kućnog reda istaknuti u svim sobama i apartmanima,
7. vidno istaknuti firmu onako kako je registrovana kod nadležnog organa i kategoriju ugostiteljskog objekta na ulazu u ugostiteljski objekat,
8. vidno istaknuti na ulazu u ugostiteljski objekat ili unjegovoj neposrednoj blizini obavijest o radnom vremenu,
9. pridržavati se radnog vremena,
10. voditi knjigu gostiju-knjigu popisa gostiju u ugostiteljskom objektu za smještaj,
11. voditi knjigu žalbi na propisan način u svakom ugostiteljskom objektu, u roku od 3 dana izjavljeni prigovor dostaviti kantonalnoj turističko-ugostiteljskoj inspekciji, te u roku od 15 dana od dana izjavljenog prigovora odgovoriti na prigovor,
12. u poslovnom prostoru-objektu obezbjediti u momentu kontrole odobrenje za rad, odnosno rješenje o razvrstavanju, minimalnim uslovima i kategorizaciji objekta,
13. alkoholna i bezalkoholna pića usluživati samo iz originalne ambalaže u skladu sa normativom na kojoj mora biti deklaracija sa podacima o proizvođaču odnosno uvozniku te neto količini,
14. namirnice koje služe za pripremanje jela moraju ispunjavati uslove propisane standardima o kvalitetu i higijenskoj ispravnosti.

Ugostitelj koji u ugostiteljskom objektu pruža usluge turistima obavezan je uz naziv vrste objekta, istaknuti i oznaku da se u tom objektu pružaju usluge turistima.

Općinsko vijeće može odrediti prostore na kojima se pružaju usluge turistima.

Član 75.

Ugostitelju je zabranjeno usluživati alkoholna pića gostu mlađem od 18 godina.

B. VRSTE I KATEGORIZACIJA UGOSTITELJSKIH OBJEKATA

Član 76.

Ugostiteljska djelatnost i pružanje ugostiteljskih usluga, obavljaju se pod određenim uslovima u pogledu uređenja i opreme ugostiteljskih objekata, kao i pod drugim uslovima propisanim zakonom i propisima donesenim na osnovu zakona (u daljem tekstu: minimalni uslovi).

Za obavljanje ugostiteljske djelatnosti i pružanje ugostiteljskih usluga moraju biti ispunjeni zdravstveni uslovi za rad u ugostiteljstvu u skladu sa posebnim propisima.

Član 77.

Ugostiteljska djelatnost obavlja se u poslovnom objektu, prostoriji i na prostoru namijenjenom, uređenom i opremljenom za pružanje ugostiteljskih usluga (u daljem tekstu: ugostiteljski objekat).

Ugostiteljska djelatnost može se obavljati i u poslovnom objektu, prostoriji i na prostoru gdje se obavlja druga djelatnost, ako su za obavljanje ugostiteljske djelatnosti ispunjeni propisani uslovi.

Član 78.

Ugostiteljskim objektima prema ovom Zakonu, smatraju se ugostiteljski objekti za smještaj i

"Službene novine Tuzlanskog kantona", broj: 10/00

ugostiteljski objekti za prehranu, a razvrstavaju se u sedam grupa i to:

1. hoteli (vrste: hotel, hotelsko naselje, aparthotel, apartmansko naselje, motel, pansion i sl.),
2. kampovi i druge vrste ugostiteljskih objekata za smještaj (vrste: kamp, sobe za iznajmljivanje, apartman, omladinski hotel, planinarski dom, odmaralište, prenoćište i sl.),
3. restorani (vrste: restoran, gostionica, zdravljak-mliječni restoran, krčma, konoba, pizzeria, objekat brze prehrane, ćevabdžinica, aščinica, burekdžinica, i sl.),
4. barovi (vrste: barovi, noćni bar, disco-bar, i sl.),
5. bife (vrste: buffet, pivnica, bistro i sl.),
6. kafane (vrste: kafana, caffe-bar, caffe slastičarna i sl.)
7. kantine i pripremaonice obroka (catering).

Član 79.

Od ugostiteljskih objekata za smještaj kategorišu se objekti iz grupe hoteli i kampovi izuzev objekata zatvorenog tipa. Oznaka za kategoriju je zvjezdica.

Hoteli se razvrstavaju u pet kategorija:

- prva kategorija označava se sa pet zvjezdica,
- druga kategorija označava se sa četiri zvjezdice,
- treća kategorija označava se sa tri zvjezdice,
- četvrta kategorija označava se sa dvije zvjezdice,
- peta kategorija označava se sa jednom zvjezdicom.

Od ugostiteljskih objekata za prehranu kategorišu se ugostiteljski objekti iz grupe restorani (vrste: restoran). Oznaka za kategoriju pojedinog restorana je bronzana, srebrna ili zlatna kapa.

Član 80.

Ugostiteljski objekt koji prestane ispunjavati uslove propisane za određenu vrstu i kategoriju objekta ne može poslovati kao ta vrsta i kategorija ugostiteljskog objekta.

Član 81.

Ugostiteljski objekt može imati naziv jedne vrste ugostiteljskog objekta zavisno od vrste usluga koje se pretežno pružaju u objektu.

Izuzetno od odredbe stava 1. ovog člana, ugostiteljski objekt može imati naziv dvije vrste ugostiteljskih objekata, ako za svaku vrstu ispunjava uslove propisane zakonom, propisima donesenim na osnovu ovog Zakona i posebnim propisima, te ako su usluge tih dviju vrsta ugostiteljskih objekata dopunjavajuće.

Član 82.

Naziv vrste ugostiteljskog objekta može se promijeniti, ako su ispunjeni uslovi propisani za pružanje druge vrste usluga u ugostiteljskom objektu.

C. POSTUPAK ZA UTVRIVANJE KATEGORIZACIJE UGOSTITELJSKIH OBJEKATA

Član 83.

Ministarstvo vrši razvrstavanje i utvrđuje, na zahtjev ugostitelja, kategoriju ugostiteljskog objekta iz grupe hoteli sa tri, dvije ili jednom zvjezdicom.

Nadležna općinska služba vrši razvrstavanje i utvrđuje, na zahtjev ugostitelja, minimalno-tehničke uslove za objekte koji se ne kategorizuju.

Uslovi iz stavova 1. i 2. ovog člana utvrđuju se rješenjem.

"Službene novine Tuzlanskog kantona", broj: 10/00

Troškove ispitnog postupka iz stavova 1. i 2. ovog člana snosi ugostitelj.
Rješenje o kategorizaciji upisuje se u Upisnik o kategorizaciji ugostiteljskih objekata.

Član 84.

Ako Ministarstvo, odnosno, nadležni organ općine ne donese rješenje iz člana 67. i člana 83. stava 3. ovog Zakona u propisanom roku ili ne donese rješenje kojim se zahtjev odbija zbog neispunjavanja propisanih uslova, ugostitelj može započeti sa radom u ugostiteljskom objektu, o čemu je dužan prethodno pismeno izvijestiti organ kojem je podnesen zahtjev.

Ministarstvo, odnosno, nadležni organ općine donijet će rješenje iz člana 67. i člana 83. stava 3. ovog Zakona i ugostitelju koji je započeo s radom u ugostiteljskom objektu na osnovu odredbi stava 1. ovog člana, ako su ispunjeni uslovi propisani ovim Zakonom.

Član 85.

Zahtjev za razvrstavanje, utvrđivanje minimalnih uslova i kategorizaciju ugostiteljskih objekata iz člana 83., sadrži:

1. firmu i sjedište ugostitelja, ime i prezime ugostitelja,
2. vrstu, naziv i mjesto ugostiteljskog objekta,
3. usluge koje će biti predmet poslovanja ugostiteljskog objekta.

Član 86.

Rješenje o razvrstavanju, minimalnim uslovima i kategorizaciji iz člana 83. stav 3. nadležni organ je dužan donijeti u roku od 30 dana od dana uredno podnesenog zahtjeva.

Član 87.

Protiv rješenja o razvrstavanju, minimalnim uslovima i kategorizaciji ugostiteljskih objekata, o kojem u prvom stepenu rješava Ministarstvo odnosno nadležni organ općine, može se u roku 8 dana od dana dostave rješenja izjaviti žalba u skladu sa federalnim propisima.

Član 88.

Rješenje o kategorizaciji iz člana 83. stava 3. ovog Zakona prestaje važiti:

1. smrću nosioca odobrenja,
2. prestankom poslovanja ugostitelja,
3. ako ugostitelj ne započne sa radom u roku od 6 mjeseci od dana donošenja rješenja.

Rješenje o razvrstavanju, minimalnim uslovima i kategorizaciji ne može se prenijeti na drugo lice.

Član 89.

Ugostiteljske usluge mogu se pružati putem pokretnih i plovnih objekata.

Pod objektom iz stava 1. ovog člana, smatra se objekt koji se može premještati iz jednog na drugo mjesto vlastitim pogonom ili vučom.

Usluge na plovnim objektima mogu se pružati u zavisnosti od tehničkih karakteristika plovnog objekta-nosivosti.

U objektu iz stava 1. ovog člana može se usluživati pićima, napicima i jelima koja su uobičajena u bifeu, samo u konfekcioniranom obliku.

Nadležni organ općine utvrđuje prostore na kojima se mogu pružati usluge u objektu iz stava 1. ovog člana.

D. KAMPOVANJE

Član 90.

Kampovanje u smislu ovog Zakona smatra se smještaj i boravak lica u prirodi, pod šatorom i drugim sličnim objektima (kamp kućice, stambene prikolice i sl.) na podesnom i ogradjenom zemljištu na kome se gostima iznajmljuju prostori za kampovanje ili kamp jedinice za smještaj vlastite ili u kampu iznajmljene opreme radi odmora i rekreacije.

Pravna i fizička lica mogu organizovati pružanje usluga kampovanja pod uslovima utvrdjenim ovim Zakonom.

Fizičko lice može organizovati kamp na zemljištu za najviše 10 smještajnih jedinica odnosno 30 gostiju istovremeno.

Za pružanje usluga kampovanja fizičko lice je obavezno pribaviti odobrenje nadležnog organa općine u skladu sa članovima 66. do 69. ovog Zakona.

Član 91.

Zemljište za kampovanje određuje nadležni organ općine.

E. UGOSTITELJSKE USLUGE UGOSTITELJA U DOMAĆINSTVU I SEOSKOM DOMAĆINSTVU

Ugostiteljske usluge u domaćinstvu

Član 92.

Pod uslovima utvrdjenim zakonom, propisima donesenim na osnovu zakona i drugim uslovima propisanim posebnim propisima, fizičko lice u domaćinstvu (u daljem tekstu: ugostitelj) može:

1. iznajmljivati gostima sobe, apartmane i kuće za odmor, kojih je vlasnik ili nosilac prava korištenja, do ukupno najviše 10 soba odnosno 20 postelja,
2. organizovati kamp na zemljištu za najviše 10 smještajnih jedinica odnosno 30 gostiju istovremeno.

Ugostitelj može pružati i usluge doručka, polupansiona ili pansiona samo gostima kojima izdaje sobe, apartmane, kuće za odmor i u kampu.

Član 93.

Ugostitelj koji pruža usluge iz člana 92. ovog Zakona obavezan je:

1. poslovati u skladu sa zakonom, propisima donesenim na osnovu zakona i poslovnim običajima u ugostiteljstvu,
2. vidno istaknuti standardizovanu natpisnu ploču za vrstu objekta u kojem pruža usluge,
3. vidno istaknuti firmu na način kako je upisana u registar na ulazu u objekt ili u neposrednoj blizini,
4. vidno istaknuti cijene usluga koje nudi i iznos boravišne takse, na propisan način, te se pridržavati istaknutih cijena,
5. voditi knjigu popisa gostiju,
6. izdati gostu račun s naznačenom vrstom, količinom i cijenom pruženih usluga za svaku pruženu uslugu, a kod pružanja usluga smještaja navesti u računu i iznos boravišne takse,
7. utvrditi normative namirnica i pića za pojedine usluge prehrane i pića, ako takve usluge

"Službene novine Tuzlanskog kantona", broj: 10/00

pruža i pružati usluge po utvrdjenim normativima, te na zahtjev normativ predočiti gostu,
8. voditi knjigu žalbi na propisan način.

Član 94.

Ugostitelj koji pruža usluge u domaćinstvu ne može biti poslodavac niti koristiti rad lica koja nisu članovi njegovog domaćinstva.

Članovi domaćinstva moraju ispunjavati i druge uslove za rad u ugostiteljstvu u skladu sa posebnim propisima.

Član 95.

Za pružanje usluga iz člana 92. ovog Zakona, ugostitelj je obavezan pribaviti odobrenje nadležnog organa općine.

Ugostiteljske usluge u seoskom domaćinstvu.

Član 96.

U seoskom domaćinstvu, koje je organizovano kao turističko-seosko domaćinstvo (u daljem tekstu: seosko domaćinstvo), član seoskog domaćinstva može pružati usluge iz člana 92. stava 1. tačke 1. ovog Zakona, osim iznajmljivanja kuća za odmor i organizovanja kampa.

Gostima kojima se pružaju usluge iz stava 1. ovog člana u seoskom domaćinstvu, mogu se pružati i usluge doručka, polupansiona, te usluživanje pića i napitaka iz pretežno vlastite proizvodnje.

U seoskom domaćinstvu mogu se pružati i usluge probanja vlastitog vina ili rakije u uređenom dijelu stambenog ili poslovnog objekta, u zatvorenom, natkrivenom ili na otvorenom prostoru za najviše 50 lica (izletnika) istovremeno.

Na pružanje usluga u seoskom domaćinstvu primjenjuju se odredbe članova 92. do 95. ovog Zakona.

IV. TURISTIČKO-UGOSTITELJSKA INSPEKCIJA

Član 97.

Inspeksijski nadzor nad provođenjem Zakona i drugih propisa kojima se uređuje ugostiteljska i turistička djelatnost obavlja Ministarstvo u skladu sa zakonom.

Inspeksijski nadzor u okviru nadležnosti Ministarstva vrši Kantonalna turističko-ugostiteljska inspekcija (u daljem tekstu: Inspekcija).

Član 98.

Inspekcija obavlja nadzor koji se odnosi na:

1. razvrstavanje i minimalne uslove za rad ugostiteljskih i turističkih objekata,
2. kategorizaciju ugostiteljskih i turističkih objekata,
3. izvršavanje ugovornih obaveza između prodavaca i kupaca ugostiteljskih i turističkih usluga,
4. obračun, naplatu i uplatu boravišne takse,
5. isticanje i pridržavanje objavljenih cijena ugostiteljskih i turističkih usluga, te izdavanje računa za obavljene usluge,
6. utvrđivanje i pridržavanje normativa jela i pića u količini i kvalitetu,
7. vođenje knjige žalbe i postupak u vezi sa prigovorima kupaca ugostiteljskih i turističkih usluga.

Osim poslova iz stava 1. ovog člana, Inspekcija obavlja i druge poslove koji su zakonom

stavljani u njenu nadležnost.

Član 99.

Poslove inspekcije obavljaju kantonalni turističko-ugostiteljski inspektori (u daljem tekstu inspektori).

Član 100.

Za kantonalnog inspektora može biti postavljeno lice koje pored općih uslova za prijem ispunjava posebne uslove propisane federalnim zakonom.

Član 101.

Pored poslova osnovne djelatnosti kantonalni inspektori obavljaju i poslove iz djelokruga inspekcije kao što su: nadzor nad iznajmljivanjem soba, kuća i stanova za odmor, turističkih apartmana, pridržavanjem radnog vremena, isticanjem cijena, izdavanjem računa, prijavom i odjavom boravka turista, obračunom, naplatom i uplatom boravišne takse, normativima u ugostiteljstvu i sl.

Inspektori mogu u poslovima nadzora iz stava 1. ovog člana izricati kazne na mjestu izvršenja prekršaja i podnositi zahtjeve za pokretanje prekršajnog postupka, a u ostalim poslovima nadzora ovlaštani su obavljati upravne radnje.

Član 102.

U postupku inspeksijskog nadzora inspektor je ovlašten pregledati: poslovne i druge prostorije i prostore u kojima se obavlja ugostiteljska i turistička djelatnost; robu, uređjaje i opremu kojima se obavlja ugostiteljska i turistička djelatnost; stanove i kuće za iznajmljivanje u kojima se turistima i putnicima pružaju ugostiteljske usluge; zgrade, uređjaje i opremu luka nautičkog turizma, vozila i plovnih objekata kojima se ili u kojima se obavlja ugostiteljska i turistička djelatnost; poslovne knjige, ugovore, isprave i evidencije i drugu poslovnu dokumentaciju koja mu omogućava uvid u poslovanje pravnog i fizičkog lica koje pruža ugostiteljske i turističke usluge, kao i isprave na osnovu kojih se može utvrditi identitet fizičkih lica, te obavljati druge radnje u skladu sa svrhom inspeksijskog nadzora.

Ako prilikom inspeksijskog nadzora inspektor utvrdi da količina i vrsta roba u objektu ne odgovaraju vrsti i količini naznačene robe u raspoloživoj ulaznoj dokumentaciji, inspektor je ovlašten da izvrši popis zatečenih zaliha o trošku subjekta nadzora.

Popis roba može se izvršiti i ako inspektor posumnja da se u objektu nalazi neevidentirana roba, da u objektu ima proizvoda za koje se ne zna ko je proizvođač ili je u objektu zatečena roba čije porijeklo nije moguće utvrditi u momentu nadzora.

Član 103.

Pravna i fizička lica čije su prostorije i prostori, uređjaji i oprema, odnosno predmeti rada i poslovanja podvrgnuti inspeksijskom pregledu, obavezna su omogućiti inspektorima nesmetano obavljanje inspeksijskog nadzora.

Pravna i fizička lica obavezna su na zahtjev inspektora dostaviti podatke, obavijesti i materijale koji su mu potrebni za obavljanje poslova iz njegove nadležnosti u primjerenom roku koji on odredi.

Član 104.

Inspektor će rješenjem zabraniti pružanje usluga pravnom i fizičkom licu ako utvrdi da:

1. obavlja ugostiteljsku ili turističku djelatnost bez upisa u zakonom propisani Upisnik,

odnosno, bez rješenja nadležnog organa uprave, odnosno rješenja kojim je utvrđeno da prostori, uređaji i oprema udovoljavaju propisanim uslovima ili suprotno izdanom odobrenju ako je obavljanje tih djelatnosti, odnosno, pružanje tih usluga u suprotnosti sa zakonom.

2. utvrđeni nedostaci i nepravilnosti nisu otklonjeni u određenom roku.

Inspektor će rješenje iz stava 1. ovog člana donijeti bez odgadjanja, a najkasnije u roku od 8 dana od dana završetka nadzora s utvrđenim činjenicama bitnim za donošenje rješenja.

Žalba izjavljena protiv rješenja iz stava 1. tački 1. i 2. ne odlaže izvršenje rješenja.

Član 105.

Inspektor će donijeti rješenje u slučajevima kada utvrdi da pravno ili fizičko lice obavlja djelatnost uprkos izrečenoj zaštitnoj mjeri zabrane obavljanja ugostiteljske i turističke djelatnosti, a koja je postala pravosnažna i izvršna.

Član 106.

Inspektor u provedbi rješenja iz člana 104. i člana 105. ovog Zakona pečaćenjem ili na drugi pogodan način će zatvoriti prostorije u kojima se obavlja ugostiteljska i turistička djelatnost, te može oduzeti robu, uređaje, sredstva kojima se obavlja djelatnost, do konačne odluke nadležnog organa.

Izvršno rješenje inspektora koje se odnosi na nenovčane obaveze, može se izvršiti i neposredno bez prethodne primjene prisilnih mjera predviđenih propisima o općem upravnom postupku.

Izvršno rješenje inspektora koje se odnosi na novčane obaveze prisilno se izvršava po postupku propisa za naplatu poreza.

Član 107.

Ako je zakonom predviđena mogućnost oduzimanja predmeta kojim je učinjen prekršaj, privredni prijestup ili krivično djelo, inspektor može privremeno oduzeti te predmete o čemu je dužan izdati pismenu potvrdu.

Inspektor je obavezan da uz zahtjev za pokretanje prekršajnog postupka za učinjeni prekršaj, odnosno uz prijavu za učinjeni privredni prijestup ili krivično djelo o privremenom oduzimanju predmeta odmah izvršiti nadležni organ kod kojeg pokreće postupak zbog učinjenog prekršaja, privrednog prijestupa ili krivičnog dijela učinjenog oduzetim predmetom.

Ministarstvo u čijem se sastavu nalazi inspekcija osigurat će uslove za održavanje i čuvanje privremeno oduzetih predmeta.

Član 108.

Ako inspektor u postupku inspekcijskog nadzora utvrdi da je kupcu ugostiteljske, odnosno, turističke usluge zaračunata ili naplaćena viša cijena od utvrđene, naredit će prodavcu usluge da vrati više naplaćeni iznos oštećenom kupcu usluge i bez odlaganja podnijeti zahtjev za pokretanje prekršajnog postupka.

Ako kupac usluge iz stava 1. ovog člana nije poznat, inspektor će u zahtjevu za pokretanje prekršajnog postupka predložiti da se više naplaćeni iznos oduzme kao protivpravno stečena imovinska korist.

Član 109.

Ako inspektor prilikom obavljanja inspekcijskog nadzora utvrdi nepravilnost ili nepridržavanje propisa za čiji nadzor je nadležan drugi organ, bez odgadjanja, a najkasnije u roku od 8 dana, obavijestit će taj organ.

Član 110.

Pri obavljanju inspekcijskog nadzora inspektor mora imati službenu legitimaciju inspektora kojom dokazuje svoju službenu pripadnost, identitet i ovlaštenja.

V. NADZOR

Član 111.

Upravni nadzor nad primjenom ovog Zakona i propisa donesenih na osnovu ovog Zakona, obavlja Ministarstvo.

Inspekcijski nadzor nad provođenjem ovog Zakona i propisa donesenih na osnovu zakona, te pojedinačnih akata, uslova i načina rada nadziranih turističko-ugostiteljskih objekata, vrše kantonalni turističko-ugostiteljski inspektori.

Član 112.

Ako poslovne prostorije u kojima se pružaju turističko-ugostiteljske usluge prestanu udovoljavati uslovima propisanim zakonom i drugim propisima, nadležni turističko-ugostiteljski inspektor naredit će otklanjanje utvrđenih nedostataka u određenom roku.

VI. KAZNENE ODREDBE

A. Turistička djelatnost

Član 113.

Novčanom kaznom u iznosu od 1.000 KM do 5.000 KM, kaznit će se za prekršaj pravno lice:

1. ako obavlja djelatnost suprotno odredbama člana 7. stava
1. tački 1. i 2.,
2. ako se u prometu nezakonito koristi izrazom "putnička agencija" (član 13.).

Za prekršaj iz stava 1. ovog člana kaznit će se i odgovorno lice u pravnom licu novčanom kaznom od 100 KM do 500 KM.

Član 114.

Novčanom kaznom u iznosu od 600 KM do 3000 KM, kaznit će se za prekršaj pravno lice:

1. ako ne objavi sadržaj i cijenu svake pojedinačne usluge i ne pridržava se tih sadržaja i cijena (član 7. stav 1. tačka 3.),
2. ako za svaku izvršenu turističku uslugu korisniku usluge ne izda račun s brojem i čuva kopije tog računa za vrijeme koje je određeno propisima iz područja računovodstva, odnosno najmanje 30 dana od dana izdavanja računa (član 7. stav 1. tačka 4.),
3. ako najkasnije u roku od 8 dana ne odgovori na zahtjev za traženu turističku uslugu i ne izvrši prihvaćenu uslugu prema ugovorenim uslovima (član 7. stav 1. tačka 5.),
4. ako u prostorijama i na mjestima gdje se prodaju turističke usluge ne vodi knjigu žalbi i u roku od 15 dana ne odgovori na svaki izneseni prigovor (član 7. stav 1. tačka 6.),
5. ako se ne pridržava svih drugih uslova poslovanja koje su sami utvrdili (član 7. stav 1. tačka 7.),
6. ako organizuje putovanje i boravak lica za lica koja nisu njeni članovi (član 8. stav 1.),
7. ako prilikom organizovanja putovanja za svoje članove ne koristi prijevozna sredstva u kojima su putnici i prtljaga osigurani (član 8. stav 3.).

"Službene novine Tuzlanskog kantona", broj: 10/00

Za prekršaj iz stava 1. ovog člana kaznit će se i odgovorno lice u pravnom licu novčanom kaznom u iznosu od 80 KM do 400 KM.

Član 115.

Novčanom kaznom u iznosu od 500 KM do 2.500 KM kaznit će se za prekršaj pravno lice:

1. ako ne koristi prijevozna sredstva osigurana obaveznim osiguranjem putnika u skladu sa zakonom (član 18. stav 1.),
2. ako ne osigura rizike putovanja osiguranjem putnika i njihove prtljage (član 18. stav 2.),
3. ako poslovne prostorije ne ispunjavaju uslove propisane ovim Zakonom (član 23.),
4. ako u svakom poslovnom prostoru nema zaposlenog barem jednog ovlaštenog vođitelja poslovanja (član 25.),
5. ako povjeri obavljanje poslova turističkog pratioca osobi koja ne ispunjava uslove propisane ovim Zakonom (član 43.).

Za prekršaj iz stava 1. ovog člana, kaznit će se i odgovorno lice u pravnom licu novčanom kaznom u iznosu od 100 KM do 500 KM.

Član 116.

Novčanom kaznom od 350 KM kaznit će se za prekršaj i pravno lice, ukoliko je obavljanje poslova turističkog vođiča povjerilo osobi koja ne ispunjava uslove za obavljanje poslova turističkog vođiča (član 31.)

Za prekršaj iz stava 1. ovog člana kaznit će se i odgovorno lice u pravnom licu novčanom kaznom u iznosu od 50 KM do 250 KM.

Član 117.

Novčanom kaznom u iznosu od 400 KM do 2.000 KM kaznit će se za prekršaj putnička agencija:

1. ako na ulazu u poslovni prostor putničke agencije ne izloži natpisnu ploču na kojoj je firma putničke agencije (član 13. stav 2. tačka 1.);
2. ako se na zahtjev korisnika njenih usluga ne izjasni o svojstvu i obimu ovlaštenja ukoliko zastupa druge putničke agencije (član 13. stav 1. tačka 2.);
3. ako u reklamnim i propagandnim materijalima i svim drugim poslovnim dokumentima nema vidljivo otisnutu firmu, sjedište, odnosno adresu putničke agencije (član 15.);
4. ako prije ugovaranja kupca ne obavijesti o cijeni ponudjenih usluga (član 17. stav 1.);
5. ako u poslovnim prostorijama u kojima obavlja djelatnost, tokom radnog vremena nije prisutno barem jedno lice koje ispunjava uslove za rad u putničkoj agenciji (član 23. stav 1.).

Za prekršaj iz stava 1. tački 1., 2., 3., 4. i 5. ovog člana kaznit će se ovlašteno lice putničke agencije novčanom kaznom u iznosu od 80 KM do 400 KM.

Član 118.

Novčanom kaznom od 200 KM do 1000 KM kaznit će se za prekršaj fizičko lice:

1. ako korisniku turističkih usluga ne izda račun za pruženu turističku uslugu (član 7. tačka 4.);
2. ako ne istakne radno vrijeme ili se ne pridržava radnog vremena (član 13. tačka 3.);
3. ako pri obavljanju poslova turističkog vođiča ne nosi legitimaciju turističkog vođiča na propisan način (član 33.);
4. ako ne posjeduje odobrenje od nadležnog općinskog organa za pružanje usluga turističkog vođiča (član 34.);

5. ako ne posjeduje odobrenje za rad pri pružanju usluga iz članova 52. i 53. ovog Zakona (član 54.).

Za prekršaj iz stava 1. tački 1., 2. i 3. ovog člana inspektor može kazniti fizičko lice na mjestu izvršenja prekršaja, novčanom kaznom u iznosu od 100 KM.

B. Ugostiteljska djelatnost

Član 119.

Novčanom kaznom od 1.000 KM do 5.000 KM kaznit će se za prekršaj pravno lice:

1. ako ugostiteljski objekat ne ispunjava minimalne uslove u pogledu uređenja i opreme ugostiteljskih objekata, te druge uslove u skladu sa ovim Zakonom, propisima donesenim na osnovu ovog Zakona ili ako za obavljanje ugostiteljske djelatnosti i pružanje ugostiteljskih usluga nisu ispunjeni zdravstveni uslovi za rad u ugostiteljstvu u skladu sa posebnim propisima (član 76.);
2. ako ugostiteljski objekat koji prestane ispunjavati uslove propisane za određenu vrstu i kategoriju objekta i dalje posluje kao ta vrsta i kategorija ugostiteljskog objekta (član 80.).

Za prekršaj iz stava 1. tački 1. i 2. ovog člana kaznit će se i voditelj poslovanja ugostiteljskog objekta i ugostitelj kao fizičko lice novčanom kaznom od 500 KM do 2.500 KM.

Istom kaznom iz stava 2. ovog člana kaznit će se ugostitelj fizičko lice koje pruža ugostiteljske usluge bez odobrenja nadležnog organa (član 67. stav 1.).

Član 120.

Novčanom kaznom od 800 KM do 4.000 KM kaznit će se za prekršaj pravno lice:

1. ako pruža ugostiteljske usluge licima koja nisu njeni radnici, članovi, penzioneri, te članovi uže porodice radnika i penzionera (član 63. stavovi 1. i 2.)
2. ako pružanje ugostiteljskih usluga u objektu zatvorenog tipa ne prijavi Ministarstvu (član 63. stav 3.)

Za prekršaj iz stava 1. ovog člana kaznit će se i odgovorno lice u pravnom licu novčanom kaznom od 400 KM do 2.000 KM.

Član 121.

Novčanom kaznom od 600 KM do 3.000 KM kaznit će se za prekršaj ugostitelj - pravno i fizičko lice:

1. ako vidno ne istakne cijene usluga koje nudi u ugostiteljskom objektu, na način dostupan gostima ili ako se ne pridržava istaknutih i objavljenih cijena ili ako kod pružanja usluga smještaja u cjenovnicima ne istakne i iznos boravišne takse, te ako cjenovnici nisu dostupni gostima u dovoljnom broju primjeraka (član 74. stav 1. tačka 2.);
2. ako ne vodi poslovne knjige koje sadrže podatke o nabavci, prometu robe i izvršenim uslugama, te ne osigura dokumentaciju na osnovu koje se vodi evidencija (član 74. stav 1. tačka 3.);
3. ako ne utvrdi normative o utrošku namirnica i pića za pojedine usluge prehrane i pića ili ne pruža usluge u količinama i kvalitetu u skladu sa normativima ili na zahtjev normativ ne predoči gostu (član 74. stav 1. tačka 4.);
4. ako ne izda gostu račun za svaku pruženu uslugu s naznakom vrste, količine i cijene pruženih usluga, a kod pružanja usluga smještaja ne navede i iznos boravišne takse (član 74. stav tačka 5.);
5. ako ne vodi knjigu gostiju - knjigu popisa gostiju u ugostiteljskom objektu za smještaj (član

"Službene novine Tuzlanskog kantona", broj: 10/00

74. stav 1. tačka 10.);
6. ako ne vodi knjigu žalbi u propisanom obliku i sadržaju i na propisan način, te ako ne poštuje zakonom utvrđene rokove postupka po izjavljenom prigovoru gosta (član 74. stav 1. tačka 11.);
 7. ako u momentu kontrole ne obezbijedi uvid u odobrenje za rad, odnosno rješenje o razvrstavanju, minimalnim uslovima i kategorizaciji objekta (član 74. stav 1. tačka 12.);
 8. ako ne toči alkoholna i bezalkoholna pića iz originalne ambalaže na kojoj mora biti deklaracija (član 74. stav 1. tačka 13.);
 9. ako namirnice koje služe za pripremanje jela ne ispunjavaju uslove propisane standardima o kvalitetu i higijenskoj ispravnosti (član 74. stav 1. tačka 14.);
 10. ako uslužuje alkoholna pića gostu mlađem od 18.godina (član 75.);
 11. ako ne pruža ugostiteljske usluge iz kioska,šaltera,pod šatorom, na izletištu i sl. na propisan način ili ne udovoljava propisanim uslovima (član 61.);
 12. ako ne pruža ugostiteljske usluge u pokretnom objektu na propisan način ili ne udovoljava propisanim uslovima ili pruža ugostiteljske usluge u pokretnom objektu na prostoru koji nije utvrdio nadležni općinski organ (član 89.).

Za prekršaje iz stava 1. ovog člana kaznit će se i odgovorno lice u pravnom licu novčanom kaznom od 300 KM do 1.500 KM

Za prekršaje iz stava 1. tačke 1., 2. i 8. ovog člana, inspektor može kazniti voditelja poslovanja na mjestu izvršenja prekršaja novčanom kaznom u iznosu od 100 KM.

Član 122.

Novčanom kaznom od 500 KM do 2.500 KM kaznit će se za prekršaj ugostitelj - pravno i fizičko lice:

1. ako u ugostiteljskom objektu za smještaj ne utvrdi kućni red i ne istakne ga na recepciji ili izvod iz kućnog reda ne istakne u svim sobama i apartmanima (član 74. stav 1. tačka 6.);
2. ako vidno ne istakne na ulazu u ugostiteljski objekat firmu i kategoriju ugostiteljskog objekta (član 74. stav 1. tačka 7.);
3. ako na ulazu u ugostiteljski objekat ili u njegovoj neposrednoj blizini vidno ne istakne obavijest o radnom vremenu (član 74. stav 1. tačka 8.);
4. ako se ne pridržava radnog vremena (član 74. stav 1. tačka 9.);
5. ako u ugostiteljskom objektu u kojem se pružaju usluge turistima uz naziv vrste objekta ne istakne i oznaku da se u tom objektu pružaju usluge turistima ili takve usluge pruža na prostorima koje nije odredio nadležni organ općine (član 74. stavovi

3. i 4.).Za prekršaje iz stava 1. ovog člana kaznit će se i odgovorno lice u pravnom licu novčanom kaznom od 200 KM do 1.000 KM.

Za prekršaje iz stava 1. tačke 3. i 4. ovog člana inspektor može kazniti voditelja poslovanja na mjestu izvršenja prekršaja novčanom kaznom u iznosu od 100 KM.

Član 123.

Novčanom kaznom od 400 KM do 2.000 KM kaznit će se za prekršaj fizičko lice:

1. ako iznajmljuje gostima sobe, apartmane i kuće za odmor sa više od 10 soba, odnosno 20 postelja, organizuje kamp za više od 10 smještajnih jedinica, odnosno 30 gostiju istovremeno (član 92. stav 1. tačke 1. i 2.);
2. ako pruža usluge doručka, polupansiona ili pansiona protivno odredbi člana 92. stava 2.;
3. ako vidno ne istakne cijene usluga koje nudi i iznos boravišne takse na propisan i uobičajen način, te ako se ne pridržava istaknutih cijena (član 93. stav 1. tačka 4.);
4. ako ne vodi knjigu popisa gostiju (član 93. stav 1. tačka 5.);

"Službene novine Tuzlanskog kantona", broj: 10/00

5. ako ne izda gostu račun s naznačenom vrstom, količinom i cijenom pruženih usluga za svaku pruženu uslugu, a kod pružanja usluga smještaja ne navede i iznos boravišne takse (član 93. stav 1. tačka 6.);
6. ako ne utvrdi normative namirnica i pića, ili ako takve usluge pruža suprotno utvrdjenim normativima, te na zahtjev gosta ne predoči normativ (član 93. stav 1. tačka 7.);
7. ako ne vodi knjigu žalbi na propisan način (član 93. stav 1. tačka 8.);
8. ako postane poslodavac ili koristi rad lica koja nisu članovi njegova domaćinstva (član 94. stav 1.);
9. ako članovi domaćinstva ne ispunjavaju i druge uslove za rad u ugostiteljstvu, u skladu sa posebnim propisima (član 94. stav 2.);
10. ako pruža usluge iz člana 92. ovog Zakona bez prethodno pribavljenog odobrenja nadležnog organa općine (član 95.);
11. ako pruža usluge smještaja, prodaje pića i napitaka, a ne ispunjava uslove iz člana 96. stavovi 1. i 2. ovog Zakona.

Za prekršaje iz stava 1. tački 3. i 5. ovog člana inspektor može kazniti fizičko lice na mjestu izvršenja prekršaja novčanom kaznom u iznosu od 100 KM.

Član 124.

Novčanom kaznom od 300 KM do 1.500 KM kaznit će se za prekršaj fizičko lice:

1. ako vidno ne istakne standardizovanu natpisnu ploču za vrstu objekta u kojem pruža usluge (član 93. stav 1. tačka 2.);
2. ako na ulazu ili u neposrednoj blizini ne istakne firmu na način kako je upisana u registar (član 93. stav 1. tačka 3.).

Za prekršaje iz stava 1. ovog člana inspektor može kazniti fizičko lice na mjestu izvršenja prekršaja novčanom kaznom u iznosu od 100 KM.

Član 125.

Novčanom kaznom od 100 KM do 500 KM kaznit će se za prekršaj lice koje kampuje izvan kampa ili postavlja šator, kamp-kućicu, kamp-prikolicu i drugu opremu za kampovanje izvan kampa u svrhu kampovanja (član 90. stav 1.).

Za prekršaj iz stava 1. ovog člana inspektor može kazniti lice iz stava 1. ovog člana na mjestu izvršenja prekršaja novčanom kaznom u iznosu od 50 KM.

Član 126.

Za prekršaje utvrdjene članovima 121. i 123. ovog Zakona počinjene drugi put u roku od dvije godine od pravosnažnosti rješenja o prekršaju, uz novčanu kaznu izreći će se ugostitelju i zaštitna mjera zabrane obavljanja ugostiteljske djelatnosti u navedenom objektu u trajanju od tri mjeseca do godine dana.

C. Turističko-ugostiteljska inspekcija

Član 127.

Novčanom kaznom od 1.000 KM do 5.000 KM kaznit će se za prekršaj pravno lice:

1. ako ne postupi ili u odredjenom roku ne postupi po rješenju inspektora (članovi 104. i 112.),
2. ako nastavi obavljati ugostiteljsku i turističku djelatnost uprkos izrečenoj mjeri zabrane obavljanja djelatnosti (član 105.).

"Službene novine Tuzlanskog kantona", broj: 10/00

Za prekršaj iz stava 1. ovog člana kaznit će se i odgovorno lice novčanom kaznom od 200 do 1.000 KM.

Za prekršaj iz stava 1. ovog člana kaznit će se i fizičko lice novčanom kaznom od 100 KM do 500 KM.

Član 128.

Za prekršaje iz člana 121. stav 1. tačke 2. i člana 127. stav 1. tačke 2., pored utvrdjene novčane kazne, može se izreći zaštitna mjera oduzimanja predmeta.

Član 129.

Novčanom kaznom od 800 KM do 4.000 KM kaznit će se za prekršaj pravno lice:

1. ako ne dopusti inspektoru pregled poslovnih i drugih prostorija i prostora u kojima se obavlja ugostiteljska i turistička djelatnost, robe, uređaja i opreme kojima se obavlja ugostiteljska i turistička djelatnost, stambenih prostorija i prostora u domaćinstvu, odnosno stambenih zgrada, stanova i kuća za iznajmljivanje u kojima se turistima i putnicima pružaju ugostiteljske i turističke usluge, zgrada, uređaja i opreme, luka nautičkog turizma, vozila, plovnih objekata kojima se ili u kojima se obavlja ugostiteljska i turistička djelatnost, poslovnih knjiga, ugovora, isprava i evidencije i druge dokumentacije ili ako na drugi način spriječi ili ometa inspektora u obavljanju inspeksijskog nadzora (član 102.);
2. ako inspektor u na njegov zahtjev ne dostavi u odredjenom roku podatke, obavijesti i materijale potrebne za obavljanje poslova iz njegove nadležnosti ili ako dostavi netačne podatke (član 103.);
3. ako inspektoru ne dopusti oduzimanje predmeta kojima je učinjen prekršaj, privredni prijestup ili krivično djelo (član 107.).

Za prekršaj iz stava 1. ovog člana kaznit će se i odgovorno lice novčanom kaznom od 100 KM do 500 KM. Za prekršaj iz stava 1. ovog člana kaznit će se i fizičko lice novčanom kaznom od 80 KM do 400 KM.

PRIJELAZNE I ZAVRŠNE ODREDBE

Član 130.

Rok za donošenje podzakonskih akata iz ovog Zakona je 60 dana od dana stupanja na snagu ovog Zakona.

Član 131.

Turističko-ugostiteljski objekti koji posluju na dan stupanja na snagu ovog Zakona, a koji su odobrenje za rad dobili po ranije važećim propisima, nastavljaju sa radom do odjave djelatnosti, odnosno prestanka rada, uz obavezu upisa u registar turističko-ugostiteljskih objekata.

Član 132.

Ovaj Zakon stupa na snagu osmog dana od dana objavljivanja u "Službenim novinama Tuzlanskog kantona".

Bosna i Hercegovina Predsjednik Federacija Bosne i Hercegovine Skupštine Tuzlanskog TUZLANSKI KANTON kantona, Skupština **Dr. Izet @igić, v.r.** Broj: 01-011-118-15/00 Tuzla, 21. 6. 2000. godine

Na temelju poglavlja IV, odjeljak B, članka 33. stavak 1. točka e) Ustava Tuzlanskog kantona, donosim